

Epeso

Pauloŋe Epeso yengât ekap kulemgum katyiŋgiop.

O bukulipne,

¹ Yen Epeso kapi ambolipŋaŋe Yesu Kiristohâlen biwiyenŋaŋe kepeim Anitâhât tem lâuwangim mansai. Nâ Paulo. Emelâk Anitâŋe nâŋgânihimu Yesu Kiristoŋe aposolo sâŋm âi nihiop ya mem mansan. Nâŋe heronŋe nâŋgâyŋgiŋim ekap yu kulemgum katyiŋgian.

² Awoŋnenŋe Anitâ yet Kutdânennenŋe Yesu Kiristo yâkŋe enŋatyetŋeâk otmâ nâŋgâyŋgiŋim tihityenŋe otmutâ biwi nâŋgân nâŋgânyenŋaŋe kepeiakmâ konohâk otmâ sânduk sâekgât nâŋgâyŋgiŋim ulitguman.

Wâtgât mâmâŋahât Heakŋe mâmâŋe otningimu manman âlepŋahât bulâŋe teteningimap.

³ Anitâŋe ikŋe nanŋe, Kutdânenŋe Yesu Kiristo, hâŋgângumu ge nengât tosaŋhât otmâ muop. Yawu olop yakât otmâ nenŋe yâk orop biwinenŋaŋe kepeiakmâ konohâk otmu manmâ gain. Yakât otmâ Anitâŋe ikŋe Wâtgât mâmâŋahât Heak hâŋgângumu ge mâmâŋe otningimu manman âlepŋahât bulâŋe teteningim gap. Yakât nâŋgâm Anitâ mepaem mannom.

⁴⁻⁵ Anitâŋe ikŋahâk wawaenenekmap. Otmu nenŋe yâkât senŋan tosa barahâk kinnomgât nâŋgâm ikŋe nanŋe Yesu Kiristo hâŋgângumu ge nengât tosaŋhât otmâ mumbuap yakât emet

inânñan sâm kalop. Yakât otmâ nenñe Kiristohâlen biwinenñaje kepeimunñe Anitâñe tosanenñe pilâningim nine nanne baratne sâm menenekmu mansain. Yakât nângâm yâkñe emet inânñan hân himbim ki kândikyotgowân yawu tetewuap ya sâm kalop.

⁶ Otmu ikñahâk wawaenenekmâ nengât sâm nanñe hângângumu giop yakât nângâmunnje hâu sâsâ otmap. Yakât otmâ heronje nângâwanñim mepaem mannom.

⁷⁻⁸ Kiristonje kawenennan kinmu kuñetâ muop yâkâlen biwinenñe katmunñe Anitâñe tosanenñe pilâningiop. Otmu ikñahâk wawaenenekmâ otningiop yakât nângâmunnje âlâ kândâkdâ otmap. Yakât dop sâmune nângâñet. Nenñe saru osomunnje sililiñ sâmap. Yakât dopñeâk Anitâñe wawaenenekmap ya ki pesuk sâwuap.

⁹⁻¹⁰ Anitâñe âliwahap topñe topñe, ehekñe ki ehekñe, himbimân ewan tap me hânân yu tap ya kerehâk kalop. Otmu sâp patoen Yura lohimbi otmu pâku lohimbi hârok menduhunenekbuap. Yawu otmâ âliwahap topñe topñe kalop ya orowâk Kiristohât amutgen tatmunñe kunnenñe otmâ tatbuapgât sâm kalop. Yawu gârâmâ emelâk embânâmbâek yakât topñe amokñan tatmâ gaop. Yakât otmâ lohimbi nombotñaje yeñe nângân nângân watmâ yakât topñe nângâne sâm pâpgum gawi. Yâhâ nenâmâ Anitâñe nângân nângânnenñe mem pâron pilâningimu yakât topñe nângâmain. Anitâñe sâp kalop ya ikñak ekmu ârândâñ otmu den yakât bulâñe tetem henñenñuap.

¹¹ Otmu Yura lohimbi nengât hohetnenñan lok âlâ tetem kunnenñe manmâ tihitnenñe otbuapgât

nângâm Anitâñe yakât pat kuningiop. Yakât otmâ pat kuningiop yapâek nenñe lok ya tetem tihitnenñe otbuapgât nâñgâm biwinenñane mem mambotbangim gawin.

¹² Otmu pat kuningiop yakât bulâñeâmâ Kiristone lohimbi kerek nengât tihitnenñe otbe sâñ Yura lohimbi nengâlen teteop. Nengâlen tetemu nenñe yâk orop biwinenñane kepeiakmâ konohâk otmu yâkât pat otmâ mansain. Yakât otmâ Anitâhât nâñgâmunñe âlâ kândâkdâ otmu herone nâñgâwanñim mepaem mannom.

Manman kârikñan mannomgât nâñgâm engat yâhâp ki otmain.

¹³ Kiristone lohimbi kerek nengât tosanenñahât otmâ ge kawenenñan kinmu kuñetâ muop. Yâkât den pat âlepñe ya nenñe yen pâku lohimbi ekyongomunñe nâñgâñetâ bulâñe olop. Den pat ya nâñgâñetâ bulâñe otmu yâkâlen biwiyenñane kepeiwi. Yawu otbi yan Anitâñe meyekmâ nine nanne baratne sâñ manman kârikñahât pat nen Yura lohimbi kuningiop ya yen gurâ yawuâk kuyiñgiop. Yakât otmâ ikñe Wâtgât mâmâñahât Heak hâñgângumu ge lohimbi kerek mâmâñe otningiwuapgât sâñ kalop. Yakât otmâ ya hâñgângumu yengâlen ge mâmâñe otyiñgiop.

¹⁴ Otmu pat kuningiop yakât bulâñe sâp patoen menom nâñgâm Kiristohâlen biwinenñane tiñâk kepeim mannom. Yawu manmunñe Wâtgât mâmâñahât Heakñe biwinenñan kioñmu pat yakât bulâñe menom nâñgâm engat yâhâp ki otmâ mannom. Yawu manmunñe sâp patoen Anitâñe menenekmâ ikñan torokatnenekmu manman

kârikñan manmâ heronje otbanjim mepaem yâhâmbisâin.

Anitâ Wâtgât Ambonaje mâmâne otningimu kârihem kinmain.

¹⁵ Yeñe Kutdânenñe Yesu Kiristohâlen biwiyeñaje kepeim manmâ gai. Yawu manmâ Anitâhât lohimbi orop biwiyeñaje kepeiakmâ konohâk otmu manmâ gai. Otmu yeñgât den pat ya bukulipnaje eknohonetâ nângâm tep hero nângâyinñian.

¹⁶ Yawu nângâm Kutdânenñe Yesu Kiristo âwânâit mepaeyelekman. Otmu Anitâne yuwu otyinñgiâkgât ulitguman.

¹⁷ Awoñnenñe Anitâ lañinñe Ambonaje ikñe Wâtgât mâmâñahât Heak hânğângumu ge yeñgât biwiyeñan kionmu nângân nângânyeneñe keterakyinñgiwuap. Yawu otmu Anitâne tihityeneñe otmap yakât topñe nângâm heñgenğum yâkâlen biwiyeñaje kepeim mannomaihât yâk ulitguman.

¹⁸ Otmu Anitâne yen orop menenekmâ ikñan torokatnenekmu heronje kakñan manmâ yâhâmbisâingât pat kuningiop. Pat yakât bulâñe menomgât nângâm biwinenñe mem mansain.

¹⁹⁻²⁰ Otmu Anitâ Wâtgât Ambonaje ikñe wâtñambâek Kiristo mumuñambâ mem yahalop. Otmu nen gurâ yawuâk mâmâne otningimu wâtñan kinmâ Kiristohâlen biwinenñaje tinâk kepeim manmain. Yeñe yakât nângânjetâ keterahâkgât nângâm Anitâ ulitguman.

Anitâne Kiristo mumuñambâ mem yahatmu yâkñe himbimân yâhâmu ikñe orowâk tawot.

21 Himbimân orowâk tatmâ Kiristoŋe Anitâhât hahit mem kinmâ anjelo himbimân tatmai otmu âi weke, emet amboŋe, senduk banearâ, susun me sâtŋe metŋe topŋe topŋe hânân yu tai kerek yengât kunyeŋe tatmap. Otmu emelâk embâŋân Anitâŋe hân himbim kândikyotgom âliwahap topŋe topŋe kalop ya orowâk Kiristohât amutgen tatmunŋe kunnenŋe tatmap. Otmu yawuâk kunnenŋe tatmâ yâhâwiop. Otmu sâp pesuk sâwuap yan hân himbim yu biatmu Anitâŋe hân himbim ango kândikuwuap. Otmu sâp yan gurâ yawuâk kunnenŋe tatmâ yâhâmbisâp.

22 Yakât otmâmâ âliwahap kerehâkŋe yâkât amutgen tatbuapgât Anitâŋe sâm kalop. Otmu Kiristohât komot mansain nen gurâ yawuâk yâkât amutgenâk tatmunŋe kunnenŋe tatmâ tihitnenŋe otmâ yâhâmbisâpgât sâm kalop.

23 Yakât otmâ Anitâŋe mâmâŋe otningimu Kiristo orop biwinenŋaŋe kepeiakmâ konohâk otmap. Otmu nenŋe hoŋ bawanŋimain yan yâkât launŋe otmu kâiŋe bâtŋe yawu otmâ nep mewanŋim manmunŋe ârândâŋ merândâŋ otmap.

2

Anitâŋe mem hewewen tuhunenekmu Kiristohâlen biwinenŋaŋe kepeim manmain.

¹ Emelâk Anitâŋe ki mem hewewen tuhuyekmu Kiristohâlen biwiyenŋe katbi sâp yan yenŋe orotmeme bâlenŋe topŋe topŋe otmâ tosa mem manminiwi. Yawu otbi yakât otmâ hiliwahonomaihât pat manbi.

² Sâp yan yeje engatyeneâk otmâ manman bâlenahât mâtâp watbi. Yawu otmâ weke bâlene amboyenaje biwiyenjan kionmu yâkât amutgen manmâ tem lâuwangim manminiwi. Otmu sâp yuâmâ yâkne lohimbi belângen mansai ya yengât biwiyenjan gurâ yawuâk kionmu Anitâhât den kumai.

³ Otmu yâkne Anitâhât den kum orotmeme bâlene otmai ya nenje gurâ yawuâk otbin. Yawu gârâmâ emelâk nen kerekne nenje engatnenneâk watmâ biwinenjanbâ nângân nângân bâlene âlâlâ teteminiop ya watmâ otminiwin. Yakât otmâ Anitâne lohimbi kerek nenekmu ki ârândâŋ otmu hiliwahonomgât pat otbin.

⁴⁻⁶ Yawu otmâ manbin yamâ ikŋahâk tepne nângâningim tihitnenje otmâ Kiristo hângângumu ge nengât toсахât otmâ kawenennjan kinmu kuŋetâ muop. Nenje yâkâlen biwinenje katbin yan Anitâne tosanenje pilâningim manman ânje ningimu yakât topne nângâm biwinenje huruŋ sâop. Otmu Anitâne yen gurâ yawuâk wawaeyekmâ tosayenje pilâm manman kârikŋahât pat kuyingimu mansai. Yakât otmâ yen me nen hârok Kiristo orop biwinenjanje kepeiakmâ konohâk otmu mansain. Otmu sâp pato tetewuap yan Anitâne mumuŋambâ mem yahatnenekmu Kiristo orop himbimân yâhâ tatbisâin. Yakât pat kuningimu tap. Yakât nângâm engat yâhâp ki otmain.

⁷ Nenje Kiristohâlen biwinenjanje kepeimunje Anitâne kaok nângâningim tosanenje pilâmu biwinenje huruŋ sâmu lohotŋan manmain. Otmu sâp yupâek lohimbiŋe yakât nângâŋetâ hâu sâsâ

otbuap.

8-9 Yeŋe himbimân yâhâ manman kârikŋan mannomaihât pat kuyiŋgimu mansai. Yakât nâŋgâm yeŋahât nâŋgâŋetâ yahatmu hâkyeŋe mepaemaihât yuwu sâmune nâŋgâŋet. Anitâ ikŋahâk wawaeyekmâ tihityeŋe otmâ Kiristo hâŋgâŋgumu ge yeŋgât tosehât otmâ muop. Otmu yeŋe Kiristohâlen biwiyeŋe katŋetâ Anitâŋe tosayeŋe pilâyŋgim manman kârikŋahât pat kuyiŋgimu mansai. Yeŋe wâtyeŋan ya ki mem tetewi. Yakât otmâ yeŋahât ki nâŋgâŋetâ yahatmu mepaeaknomai.

10 Otmu yeŋe Kiristohâlen biwiyeŋe katbi sâp yan Ambonenŋe Anitâŋe manman âiŋe yiŋgimu mem mansai. Yawu manmâ orotmeme âlepŋeâk otmâ tânahom mannomaihât sâm kalop.

Kiristoŋe nen lohimbi topŋe topŋe menduhunenekmu manmain.

11-12 Kiristoŋe nen Yura lohimbi otmu yen pâku lohimbi mem menduhunenekmu komot konohâk otmunŋe ikŋak kunneneŋe tatmap. Yakât topŋe yuwu sâmune nâŋgâŋet. Emelâk yen pâku lohimbiŋe Anitâhât topŋe ki nâŋgâwi. Yâhâ emelâk embâŋân Anitâŋe Awarahamgât pat kuwaŋgiop ya Yura lohimbi nengât gurâ yawuâk kunin-giop. Yakât otmâ nenŋe yeŋgât nâŋgâmunŋe gemu yuwu nâŋgâminiwin. “Nen Awarahamgât sen mansain yakât otmâ hâkneneŋahât torehenŋan undip tuhuwaŋgimain. Yâhâ yen pâku lohimbiâmâ Awarahamgât sen ki oai. Yakât otmâ ketetyekmunŋe belângen manmâ hâkyeŋahât torehenŋan

undip ki tuhuangimai. Yakât otmâ Anitâŋe hili-wahonomaihât pat kuyiŋimu mansai.” Yeŋgât yawu nâŋgâminiwin. Otmu hâknennjahât torehennan undip tuhuangiminiwin orotmeme yaŋe ki tânnongomap. Yakât otmâ orotmeme yakât nâŋgâmune tâŋjât otmap.

¹³⁻¹⁵ Otmu emelâk yeŋe Kiristohât topŋe ki nâŋgâm belângen manbi. Yâhâ sâp yuâmâ yâk orop biwiyeŋaŋe kepeiakmâ konohâk otmu mansai. Yawu gârâmâ Kiristo Biwi kepeiak kepeiak Amboŋe ikŋak nen Yura lohimbi otmu yen pâku lohimbi kerek nengât tosanennjahât otmâ kawenennan kinmu kuŋetâ muop. Muop yan yeŋe Anitâhât komolân torokatnomaihât mâtâp meyiŋgiop. Yawu olop yakât otmâ Anitâŋe yen orop kaok nâŋgâningimu biwinennyaŋe kepeiakmâ konohâk otmu buku oraŋgimain.

Yâhâ emelâk embâŋân Anitâŋe girem den âlâlâ Mose ekumu kulempuop. Otmu Yura papatolipnennyaŋe yeŋe nâŋgân nâŋgân watmâ girem den yan den âlâlâ torokatbi. Otmu nenŋe den ya lâum yen ketetyekmunŋe yaehen manŋetâ yen orop kasa kârikŋe manminiwin. Otmu den âlâlâ torokatminiwi yaŋe undip kârikŋe olop. Yawu gârâmâ Kiristoŋe tosanennjahât otmâ muop yan undip ya mem gahaem yen orop menduhunenekmu komot konohâk otmâ manmain.

¹⁶ Otmu Kiristoŋe tosanennjahât otmâ kawenennan kinmu howanân kuŋetâ muop yan mem menduhunenekmu Anitâŋe kerek nengât kaok nâŋgâningimap. Otmu nenŋe biwinennyaŋe sânduk sâmu buku oraŋgim manmain.

¹⁷ Kiristoŋe yawu otningiop yakât den pat

anjoân nen Yura lohimbi eknongop. Otmu nenñe yâkât den ya torokatmâ yen kâsikum yingim gain.

18 Yakât otmâ Wâtgât mâmâñahât Heakñe biwinenñan kionmâ yen orop mem hewewenñe tuhunenekmu Kiristohâlen biwinenñane kepeimain. Yawu otmunñe Kiristonñe mâtâp mem teteningimu âwânñe Anitâhâlen biwinenñane kepeim mepaem mannom.

Nen Anitâhât sen otmâ mansain.

19 Emelâk nen Yura lohimbiñe yen pâku lohimbi yekmunñe kasa kârikñe otmu keterakmâ ikñiâk ikñiâk manminiwin. Yâhâ sâp yuâmâ nenñe yen orop manman bâleñambâ keterakmâ orotmeme bâleñe pilâm Anitâhâlen biwinenñane kepeim komot konohâk otmâ mansain. Yakât otmâ Anitânñe menenekmu ikñe sen otmâ mansain.

20 Yakât topñe nânğâñetâ keterahâkgât emet tuhumain yan hâum sâmunne nânğâñet. Hân aim saran lâum kânânğâmunñe kinmap yanñe Kiristohât aposololipñe otmu poropetelipñe nengât dop oap. Otmu saran yakât kakñan hohem katmâ kokore pilâm gârem kâwi huhum pilâmain yanñeâmâ lohimbi menduhuakmâ Anitâ mepaemai yakât dop oap. Otmu kuhupin lâum kânânğâmunñe ñiwiñ ñiwiñ sâm kinmap yanñeâmâ Kiristo ikñahât dop oap.

21 Otmu kuhupin kakñan gimbâ katmâ geri kum pilâm losohomunñe emet ya âilonço kinmap yakât dopñeâk nenñe Kiristohât komot konohâk otmâ yâkât wâtñan manmain. Yawu manmâ Anitâhât opon kâmbukñe yakât dop otmâ manmain.

22 Otmu emelâk Anitâñe ikñe opon kâmbukñan ge tatminiop yakât dopñeâk ikñe Wâtgât mâmâñahât Heak hângângumu ge biwinenñan tatmâ mâmâñe otningimu manmain. Yawu otningimu biwinenñane kepeiakmâ konohâk otmu buku konok orañgim manmâ yâhânom.

3

Anitâñe Paulohât nâñgân nâñgânñe mem pâron pilâwanjiop.

1-2 Yen pâku lohimbine Kiristohâlen biwiyenane kepeim Anitâhât komolân torokatñetgât Anitâñe ikñahâk nâñgânihim aposolo âi nihimu mem mansan. Âi ya mem Kiristo hoñ bawanñim yâkât den pat âlepñe ekyongoman. Den pat âlepñe ekyongomune lok nombotñane den ya nâñgâñetâ gemu bet pilâm pâi emetñan mem katneñetâ manmâ gan.

3 Emelâk Anitâhât biwiñan nâñgân nâñgân âlâ nâñgâm gaop ya nâñgâmune keterahâkgât nâñgân nâñgânne mem pâron pilânihimu nâñgâwan.

4 Otmu den yakât nâñgâmune biwinambâ nâñgân nâñgân âlâlâ tetemap ya pâne tâlâwâk kulemgum katyñgian yu ekmâ nâñgânomai.

5 Emelâk embâñâmbâek Anitâñe lohimbi âlâ me âlâhât nâñgân nâñgânyene ki mem pâron pilâyñgiop. Yakât otmâ den yakât pâpñuwi. Yawu gârâmâ sâp yuâmâ Anitâhât Wâtgât mâmâñahât Heakñe den ya mem Kiristohât aposololipñe otmu poropetelipñe nengât biwinenñan katmu nâñgâmain.

⁶ Den yakât topņe yuwu sâmunne nâņgâņet. Nenņe Yesu Kiristohât den pat âlepņe yen pâku lohimbî ekyongomunņe nâņgâņetâ bulâņe otmu yâkâlen bi-wiyenâņe kepeim mansai. Yawu manņetâ Anitâņe nen Yura lohimbî orop mem menduhunenekmu komot konohâk otmâ mansain. Yawu manmunņe sâp pato tetewuawân Anitâņe manman kârikņahât pat yakât bulâņe ningimu mem Yesu Kiristo orop heronņe kakņan tatbisâin.

⁷ Anitâņe ikņe enņatņeâk otmâ menekmâ aposolo âi sâm nihiop. Âi ya mem yâkât wâtņan kinmâ Kiristohât lohimbî hoņ bayiņgim yâkât den lohimbî kâsikum yîņgiman.

⁸ Yâhâ emelâk yâkât lohimbî dondâ mem bâleyekminiwan. Yakât otmâ ninahât nâņgâmune gemu Anitâhât lohimbî yenņât amutyenān mansan yawu nâņgâmune otmap. Yamâ nâņe mem bâleyekminiwan yapâek Anitâņe menekmâ âi sâm nihimu Kiristohât den pat ya yen pâku lohimbî ekyongom gan. Yakât yuwu sâmunne nâņgâņet. Kiristonņe wawaenenekmâ tihitnenņe otmu manmannenņahât bulâņe teteningimu biwinenņe huruņ sâmu manmain. Otmu yawuâk otningim yâhâwuap. Yakât topņe nenņahâk nâņgâm ba takanomgât dop ki tap.

⁹⁻¹⁰ Otmu girawu manmunņe Anitâņe nenekmu ârândâņ otmu manman kârikņahât pat kuningiwuap yakât den sâm holanmâ pâku lohimbî ekyongomune nâņgâmai. Otmu Anitâ Hân Himbim Amboņāņe nen Kiristohât lohimbî kerek mem hewewenņe tuhunenekmu Kiristohât den pat sâm haok tuhonom. Yawu otnom yan

Anitâhât biwiñan nângân nângân âlâlâ tatmap yakât bulâñe topñe topñe tetemu añelolipñañe ekñetâ âlâ kândâkdâ otbuap. Yakât nângâm emelâk embâñâmbâek yâkñe lok âlâ me âlâhât nângân nângânyenñe ki mem pâron pilâyinñiop. Yakât otmâ den yakât topñe pâpguwi.

¹¹ Yawu otmâ ikñe nângân nângân watmâ sâpñe ekmu ârândân otmu Kutdânenñe Yesu Kiristo hângângumu giop yan den yakât bulâñe teteop.

¹² Nenñe Kiristohâlen biwinenñañe kepeim Anitâ pahâk ulitgumunñe nângâningiwuap. Yakât nângâm nenñe biwi yâhâp kakñan ki ulitgunom.

¹³ Nâñe Kiristohât den pat kâsikum yinñimune nângâñetâ bulâñe otmu yâkâlen biwiyenñañe kepeim mansai. Yakât otmâ lok nombotñañe pâi emetñan mem katnekñetâ manmâ gan. Nâñe yengât nângâm hâhiwin kakñan mansan yakât nângâm yenñe kârihem kinmâ biwiyenñe ki orotok sâwuapgât nanñan.

Kiristonñe wawaenenekmap yakât Paulonñe kulemguop.

¹⁴⁻¹⁵ Yen pâku lohimbiñe Kiristohâlen biwiyenñañe kepeim Anitâhât komolân torokatñetâ nen Yura lohimbi orop biwinenñañe kepeiakmâ konohâk otmu mansain. Anitâhât añelolipñe topñe topñe himbimân tatmai otmu âliwahap topñe topñe hânân yu kalop, ehekñe ki ehekñe, kerek nengât manmannenñe Awoñnenñe Anitâ ikñak ningimu manmain. Yâkñe nine nanne baratne sâm menenekmu mansain yakât nângâmune hâu sâsâ otmu mepaeman.

16-17 Anitâ Manman Amboņaje koko salehâk tatmap. Otmu yu yakât ki pâpğumap. Yawu tatmap yakât nângâmunje âlâ kândâkdâ otmap. Otmu nâje yeņgât nângâm yâk ulitgumune ikņe Wâtgât mâmâņahât Heak hâņgângumu ge mem hewewen tuhuyekmu Kiristohâlen biwiyenaje tiņâk kepeim tem lâuwangim mannomai. Yawu otņetâ yâk orop biwiyenaje kepeiakmâ konohâk otmap yakât dopņeâk bukulipyene orop biwiyenaje kepeiakmâ konohâk otmu buku orangim mannomai.

¹⁸ Otmu Kiristone wawaenenekmâ kawenennan kinmu kuņetâ muop yakât topņe nâņgâņetâ keterakyiņgim henņeņguâkgât Anitâ ulitguman.

¹⁹ Yeņgât yawu ulitguman. Yawu gârâmâ Kiristone wawaenenekmap yakât topņambâek nâņgâm metenomgât dop âlâ ki tap. Yawu gârâmâ yeņe yâkâlen biwiyenaje tiņâk kepeim manņetâ yanâmâ Wâtgât mâmâņahât Heakņe mâmâņe otyiņgiwuap. Mâmâņe otyiņgimu manmanyenahât bulâņe âlâlâ teteyiņgimu Kiristone wawaeyekmap yakât topņe nâņgâm henņeņgunomai. Manmanyenahât bulâņe teteyiņgiwuap yakât dopņanâk âi mem Anitâ hoņ bawaņgim manmâ yu yakât ki pâpğunomai.

²⁰ Anitâhât Wâtgât mâmâņahât Heakņe mâmâņe otningim yâhâwuap. Yakât otmâ nenņe Kiristo hoņ bawaņgim nep âlâlâ memunņe yakât bulâņe tetewuap nâņgâmain ya wangim tetewuap.

²¹ Yakât nâņgâm Kiristohâlen biwinenņaje kepeim hoņ bawaņgim manmunņe bulâņe âlâlâ tetemu ekmâ Anitâ mepaem manmâ yâhâmbisâin. Ya bonņanâk.

4

Kiristo hon bawangim tânahom mannom.

¹ Bukulipne, yuwu sâmunê nângâñet. Nâñe Kiristohâlen biwinanê tiñâk kepeim hon bawangim yâkât den pat lohimbi kâsikum yingiman. Otmu emelâk den ya kâsikum yingimune lok nombotñanê nângâñetâ gemu bet pilâm pâi emetñan mem katnekñetâ manmâ gan. Otmu den ekyongomune nângâñetâ Anitâhât Wâtgât mâmâñahât Heakñe biwiyeñe mem hewewenñ tuhumu yapâek Kiristohâlen biwiyeñanê kepeim mansai. Yakât otmâ yâkât den ya tiñâk lâum manñetâ lohimbiñe manmanyenê ekñetâ ârândânñ olâkgât nanñan.

² Otmu yeñahât nângâñetâ gemu huruñ huruñ manmâ bukulipyenê orop ewe karangim mannomai. Yawu manmâ buku nombotñanê nângâm bâleyinginomai yan biwiyeñanê kepeiyekmâ lohotñan otyinginomai.

³ Sâp yiwerenê yuâmâ biwiyeñanê kepeiakmâ konohâk otmu mansai. Yawuâk torokatmâ manne sâmâmâ tihit oranñim biwi sânduhân mannomaihât nanñan.

⁴ Anitâhât Wâtgât mâmâñahât Heak ikñak mem hewewenñ tuhunenekmu Kiristohâlen biwinenñanê kepeim yâkât komot konohâk otmâ mansain. Yawu manmunñe Kiristo ikñak âwurem ge menenekbuapgât nângâm biwinenñe mem manmain.

⁵ Kutdânenñeâmâ Kiristo konohâk. Otmu yâkât den konohâk lâum manmain. Otmu toen katnenekñetâ Kiristo orop biwinenñanê kepeiakmâ konohâk otmap yakât mâtâp konohâk tap.

6 Otmu Awoŋnenŋeâmâ Anitâ ikŋak kunnenŋe pato tatmap. Otmu Anitâŋe wosapâ me wosapâ ki tatmap yawuya âlâ ki tap. Yakât otmâ himbimân aŋelolipŋe tai otmu hânân âliwahap topŋe topŋe kalop ya kerehâk hohem tatmu yâkât wâtŋan tatmâ gamain.

7 Otmu Kiristone ikŋahâk biwinenŋahât topŋe ekmâ nâŋgâmap. Otmu Wâtgât mâmâŋahât Heak hânŋângumu ge biwinenŋan tatmâ mâmâŋe otningimap. Yawu otningimu manmannenŋahât bulâŋe ikŋiâk ikŋiâk teteningimap yakât dopŋanâk âi topŋe topŋe mem Kiristo hoŋ bawanŋimain.

8 Den yan yuŋe emelâk lok âlâŋe Anitâhât den kulemuop ya miap. Den yamâ yawu tap.

“Lohimbiŋe hoŋ bawanŋiŋetgât yâkŋe meyekmâ himbimân âwurem yâhâop. Yawu otmâ mâmâŋe otyiŋimu âi meŋetâ yan bulâŋe âlâlâ teteop.” Den yawu tap.

9 Aiop, “himbimân âwurem yâhâop,” den yawu kulemuop. Den ya ekmâ yuwu nâŋgâmain. “Aŋgoân himbimâmbâ ge hânân manmâ muop,” yawu nâŋgâmain.

10 Otmu mumuŋambâ yahatmâ himbimân âwurem yâhâmu Anitâ orop tawot. Yawu otmâ kunnenŋe tatmâ mâmâŋe otningimu yâkât lauŋe, otmu kâiŋe bâtŋe yawu otmâ hoŋ bawanŋinom. Hoŋ bawanŋim yâkât den pat sâm haok tuhumunŋe hânŋan kulemŋan ariwuap.

11 Yâkŋe mâmâŋe otningim âi ikŋiâk ikŋiâk ningimu mem tânahom manmain yamâ yuwu. Lok nombotŋaŋe lohimbi belâŋen manmai ya yeŋgâlen ari Kiristohât den pat âlepŋe

ekyongomunŋe nâŋgânomaihât kut aposolo sâŋ âi ningiop. Yâhâ lok nombotŋeâmâ nen tânnongonjetâ lohimbi Kiristohât den pat âlepŋe orowâk kâsikum yinŋinomgât kut bawapi sâŋ yinŋimap. Yâhâ lok nombotŋeâmâ Anitâhât biwiŋan den âlâlâ tatmap ya sâŋ holaŋmâ lohimbi ekyongonomaihât kut poropete sâŋ âi yinŋimap. Yâhâ lok nombotŋeâmâ Anitâhât lohimbi yengât kunlipyenŋe manmâ yâkât den kâsikum yinŋim galeyongonomaihât kut pasto sâŋ âi yinŋimap. Yâhâ lok nombotŋeâmâ pasto tânyongom lohimbi den kâsikum yinŋinomaihât kut papasu sâŋ âi yinŋimap.

12 Yawu gârâmâ nenŋe Anitâ nanŋahâlen biwinenŋaŋe tinŋâk kepeim mannom. Yawu manmâ âi ningiop ya mem lohimbi orop tânahom manmunŋe manmannenŋe kelihakbuap.

13 Yawu otmâ biwi nâŋgân nâŋgânnenŋaŋe menduhuakmâ konohâk otmu Kiristonŋe hânân manmâ olop miop yawuâk otmâ mannom. Yawu otmâ manmunŋe Anitâŋe nenekmu Kiristohât dop yawu otbuap.

14 Yâhâ sâp yu manman girawu mansai yakât topŋe nâŋgânetâ keterahâkgât yuwu sâŋmune nâŋgânet. Nimnaom titipâŋe bukulipyenŋe orop enŋalân gianŋim âwâ mâmâlipyenŋe yengât den kum ari malon manmai. Yenŋe yakât dopŋeâk otmâ mansai. Otmu yakât den âlâen hâum sâŋmune nâŋgânet. Nenŋe waŋga mem saru kakŋambâ arimain. Arimainângembâ siru pato pilâmu to dondâ bâlemap. Yawu otmâ waŋga ya mem kopa kopa tuhumap. Yakât

dopneâk lok perâkneje Kiristohât den kelangatmâ den perâkne topne topne kâityongomai. Yawu otmâ nângân nângânyene mem hâlim milim tuhunetâ mansai. Yawu gârâmâ sâp yupâek yene biwiyene galemahom mannetâ manmanyene kelihakbuapgât yuwu otmâ mannomai.

¹⁵ Bukulipyene orop biwiyenane kepeiakmâ konohâk otmu Anitâhât den tâj tâjâk watmâ den bulâneâk alahunomai. Yawu otnomai yan manmanyenahât bulâne tetem gap ya wangim bulâne pato tetewuap. Otmu Kunnene Kiristone manop yawuâk manne sâm yâkne olop miop yawuâk otmâ mannomai.

¹⁶ Yakât nângâm yuwu sâmune nângânet. Hâkneneâmâ konohâk. Yawu gârâmâ Anitâne ikne engatneâk otmâ hâknenehât torehene âlâ âlâ kalop ya watmâ âi ambojan ambojan tulumai. Yawu otmâ manmannene tetemu âlepne manmain. Aiop, Kiristone kunnene tatmap. Otmu nenneâmâ yâkât laune, otmu kâine bâtne otmâ hoj bawangim manmain. Yawu otmâ manmunne yâkne ikne hahit ningimu mem yâkât den tijâk lâum bukulpnenne orop biwinenane kepeiakmâ konohâk otmu tânahom manmain. Yawu manmunne manmannene kelihakmu mannom.

Anitâne manman âine ningimu mem mansain.

¹⁷ Otmu yengâlen gâtne lohimbî nombotnane pâku lohimbine otjetâ bâlemap yawu manmâ otjetâ bâlem gap. Yakât otmâ nâne Kutdâhât sâtgât otmâ kuyinginetgât yuwu sâmune nângânet.

¹⁸ Pâku lohimbî belângen manmaine yene nângân nângânyene bâlene ya watmâ omon

kâlehen manmai. Otmu Anitâne manman âine nen ningimu mem mansain. Yakât topnahât pâpgum biwiyene kârikne otmâ hiliwahonomaihât pat mansai.

¹⁹ Otmu ekñâleangim orotmeme kinjon manjon otneâk nângâmai. Yawu otmâ anjonyehât ki otmai.

²⁰⁻²¹ Yâhâ nenne Kiristohât den ekyongomunne nângânetâ bulâne otmu yâkâlen biwiyenane kepeiwi. Sâp yapâek yâkât tem lâum orotmeme âlepneâk otjetgât yâkât den bulâne kâsikum yingimunne nângâm gai.

²² Emelâk yene nângân nângânyene tânjât ya watmâ senne âlâlâ ekñâlem otjetâ dondâ bâleminiop. Yawu manjetâ nângân nângânyene gulip malap otmu manmanyene dondâ bâlemu manmâ gawi. Otmu orotmeme bâlene otmâ mansai yane mem bâleyekmagât ya bunewâk bet pilânetgât nanjan.

²³⁻²⁴ Yawu otjetâ yanâmâ Anitâne biwiyene mem hewewen tuhun nângân nângân âine, ikne yawuya, biwiyenan katbuap. Nângân nângân âine biwiyenan katbuap ya watmâ yâkât den tem lâuwanjim biwiyene galemgum henjenjum mannomai. Yawu manjetâ manmanyene kelihakmu Anitâne yekmu ârândânj otbuap.

²⁵ Nenne Kiristohât komot konohâk otmâ mansain. Yakât otmâ biwiyene kurihakmâ manjetâ manmanyenane tawi tawine otmagât orotmeme bâlene ya betgum pesuk pilâm den bulâneâk alahum tihit oranjim mannomai.

²⁶ Yawu gârâmâ lohimbî âlâ me âlâne mem bâleyekjetâ kuk otnomai yan Anitâhât den lâum in

yawu kaok oraŋginomai.

²⁷ Yawu otmâ Satan Manman Bâleŋe Amboŋahât mâtâp maŋuwaŋginomai.

²⁸ Yeŋe lohimbi komborâ ekyongonêtâ ki kombo tuhunomai. Yâkŋe âi mem manmâ yapâ hâmeŋe mem yeŋe tânahom nombotŋe kâsikum lohimbi umburuk mansai ya tânyongonomai.

²⁹ Den hako ki sahaŋginomai. Otmu bukulipyenaje biwiyenje galemahom kârihem kinŋetgât mem hewewen tuhuyekmâ den lohotŋan ekyongonomai.

³⁰ Anitâŋe meyekmâ manman kârikŋahât pat kuyiŋgiop. Yawu gârâmâ sâp pato tetewuap yan pat yakât bulâŋe yiŋgimu menomai. Yakât nâŋgâm enŋat yâhâp otmaiât ikŋe Wâtgât mâmâŋahât Heak hâŋgângumu ge biwiyenjan tatmâ mem hewewen tuhuyekmu mansai. Yakât otmâ Wâtgât mâmâŋahât Heakŋe tep bâle nâŋgâyiŋgimapgât orotmeme bâleŋe ki tâtâem otmâ mannomai.

³¹ Yawu otmâ ki kuk otmâ sârehahom den bâleŋe hâiaknomai. Otmu ki nâŋgâm bâleŋiŋjetâ biwiyenje ŋasin otbuap.

³² Yâhâ yeŋe Kiristohâlen biwiyenaje kepeim manŋetâ Anitâŋe tosayenje pilâyiŋgimap yakât dopŋeâk bukulipyenje orop tosayenje pilanŋginomai. Yawu otmâ ewe karaŋgim lohotŋan oraŋginomai.

5

Manman bâleŋambâ keterakmâ Anitâhât tem lâuwaŋgim mannom.

¹ Anitâŋe wawaeyekmâ nine nanne baratne sâm meyekmu mansai. Yakât otmâ yeŋe gurâ

yawuâk bukulipyenê orop biwiyenâje kepeiakmâ konohâk otmu mannomai.

² Kiristone biwiñâje kepeinenekmâ ikñe manmanñe ki alilop. Yawu otmâ Anitâ âwâñahât tem lâuwangim kawenenñan kinmu kuñetâ muop. Yawu otningiop yakât Anitâñe nâñgâmu ârândân olop. Otmu yenê gurâ yawuâk bukulipyenê orop biwiyenâje kepeiakmâ konohâk otmu buku orañginomaihât nañgan.

³ Yenê manman bâleñe pilâm yapâ keterakmâ Anitâhât tem lâuwangim mansai. Yakât otmâ ki ekñâleanñim kâwâ konda otnomai. Me bukulipyenê yengât senñe âlâlâ ki ekñâlenomai.

⁴ Yâhâ orotmeme kingoñ otnomai yanâmâ añun pato tetemu dondâ bâlewuap. Yawu gârâmâ bukulipyenê yengât senyenñan ki genomai. Me den imbiâk mambiâk ki sahañginomai. Yawu otmâ bukulipyenê yengât nâñgâm Anitâ mepaenomai.

⁵ Lohimbi nombotñâje senñe âlâlâ ekñâlem biwiyenê yanâk kinmu yakâlâk nâñgâm manmai. Lohimbi yawu manmai ya yengât Anitâñe nâñgâmu Porom Lâpiohâlen biwiyenâje kepeim mepaemai yawu otmap. Lohimbi yawu otmâ manmainê lohimbi kâwâ konda otmai orop Anitâñe manman kârikñahât pat ki kuyiñgiwuap. Yakât otmâ yâkñe Kiristo âwâñâit orop himbimân ki tatnomai.

⁶ Lohimbi âlâ me âlâñe den imbiâk sâm engatyenñan geñetâ orotmeme bâleñe yakât nâñgâñetâ bulâñe otmapgât yuwu sâmune nâñgâñet. Orotmeme bâleñe âlâlâ sâm aran yu lohimbiñe otnomai yanâmâ Anitâñe kuk otyiñgim matñe amokñan yiñgimu menomai.

7 Yakât otmâ lohimbi yawuya orop biwiyenaje ki kepeiakmâ konohâk otmu tânahonomai.

8 Emelâk yeŋe Anitâhât pâpŋum omoŋ bâleŋan manminiwi. Yawu gârâmâ ikŋe laŋinŋaje biwiyenjan pilâmu Kutdâhâlen biwiyenaje kepeim manmâ gai. Yakât otmâ orotmeme bâleŋe bet pilâm Anitâhât tem lâum mannomai.

9 Yawu otmâ manŋetâ manmanyenje kelihakmu yakât bulâŋe âlepŋeâk tetewuap. Yawu tetemu Anitâŋe manmanyenje ekmu ârândâŋ otbuap.

10 Yawu gârâmâ yeŋe manman girawu manŋetâ Anitâŋe yekmu ârândâŋ otbuap yakât nâŋgâm ki-wilim otmâ lohotŋan mannomai.

11-13 Otmu lohimbiŋe omoŋân ge hiliwahonomaihât pat mansai ya yeŋgât manmanyenjeâmâ tawi tawiŋe. Yakât otmâ yâk orop ki buku oraŋginomai. Yâkŋeâmâ yok pilâm orotmeme bâleŋe topŋe topŋe oraŋgimai. Yakât nâŋgâm aŋulakmaingât otmai yakât ki alahumain. Yâhâ nenŋe yu me yakât nâŋgâmunŋe haŋ sâningimap yakât topŋe tetekŋan tetemu ekmain. Yakât otmâ yâkŋe orotmemeyenje bâleŋe yakât nâŋgâŋetâ haŋ sâyŋgimu bet pilâŋetgât yeŋe den ekyongom eŋgatyenjan genomai.

14 Den ekyongonjetâ nâŋgâŋetâ haŋ sâyŋgimu yanâmâ yâkŋe manmanyenjahât topŋe tetekŋan tetemu eknomai. Yakât nâŋgâm kep yuwu menjetâ nâŋgâmain.

“Kâlâwahom yahatne. Mumuŋambâ yahatne. Yawu otmunŋe Kiristohât laŋinŋaje biwinenjan pilâmu haŋ sâningiwuap.”

15-17 Anitâhât biwiŋan nâŋgân nâŋgân âlâlâ

tatmap ya Wâtgât mâmâñahât Heakñe mem biwiyenjan katmu nâñgâñetgât Anitâ ulitgunomai. Yakât otmâ girawu manñetâ Kutdâñe yekmu ârândân otbuap yakât nâñgâm kiwilim biwiyene galemahom mannomai. Yâhâ sâp yuâmâ lohimbi nombotñane Anitâhât topñahât pâpgum orotmeme bâleñe topñe topñe otmâ mansai. Yâhâ yeñeâmâ yâkñe otmai yawu ki otnomai. Yeñeâmâ orotmeme âlepñe orotgât mâtâp teteyiñgimu lohimbi buku otyiñginetâ yâkñe manmanyene ekñetâ ârândân otbuapgât nanjan.

¹⁸ Otnetâ bâlemapgât to kârikñe ki nem biwi hâlim otnomai. Yawu otmâ Wâtgât mâmâñahât Heakñe biwiyenjan tatmâ mâmâñe otyiñgiâkgât nâñgâm mannomai.

¹⁹ Yawu manñetâ biwiyenjan tatmâ mâmâñe otyiñgiwuap yanâmâ biwiyene herone otmu Kutdâ kiki pali mewañgim mepaem mannomai.

²⁰ Otmu yeñe Kutdânenñe Kiristo orop biwiyenane kepeiakmâ konohâk otmu manñetâ wuân me wuân teteyiñgiwuap yan Awonnenñe Anitâ herone nâñgâwañgim mepaem mannomai.

²¹ Otmu Kiristo ewe katmâ yâkât tem lâuwañgim bukulipyene orop ewe karakmâ buku orañgim mannomai.

Imbilipyene yengât sâop.

²² Imbilipyene yengât yuwu sâmune nâñgâñet. Kutdânenñe Kiristone yengât kunyene tatmap. Yakât otmâ yeñe ewe katmâ loklipyene yengât amutgen mannomai.

²³⁻²⁴ Yakât yuwu sâmune nâñgâñet. Kiristone ikñe lohimbi nen sârerenenekmâ kawenenñan kinmu

kuñetâ muop. Otmu mumuñambâ yahatmâ kunnenñe tatmu nenñe yâkât amutgen manmain. Yakât dopñeâk imbilipyenñe wuân me wuân otmai yan loklipyenñe yengât amutgen manmai.

Loklipyenñe yengât sâop.

²⁵ Yâhâ loklipyenñe yengât yuwu sâmune nângâñet. Kiristone ikñe lohimbi nen wawaenenekmâ tosanenñahât otmâ kawenenñan kinmu kuñetâ muop. Yakât dopñeâk imbilipyenñe yengâlen biwiyenñe kepeim tihityenñe otnomai.

²⁶⁻²⁷ Yakât otmâ yuwu sâmune nângâñet. Sâp patoen nen Kiristohât lohimbiñe yâkât senñan tosa barak kinmunñe menenekmâ onomlipne sâm ikñan torokatnenekbuap. Yakât nângâm tosanenñahât otmâ kawenenñan kinmu kuñetâ muop. Otmu nenñe manman bâlenñambâ keterakmâ yâkâlen biwinenñenñe kepeimain yakât topñe sâm tetemunñe yanâmâ toen mem katnenekbi. Toen mem katnenekñetâ Anitâñe tosanenñe pirim salatak tuhuningimu yâkât senñan koko salehâk manmain. Yawu.

²⁸⁻³⁰ Kiristone ikñe lohimbi nen nângâningim tihitnenñe otmap. Yakât dopñeâk loklipyenñe imbilipyenñe nângâyîngim tihityenñe otnomai yakât yuwu sâmune nângâñet. Lok âlâ me âlâñe hakyenñan umatñe wuân me wuân tetemapgât hâkyenñahât tihitñe otmâ galemahom manmai. Yakât dopñeâk loklipyenñe imbilipyenñe yengât nângâm tihityenñe otmâ galemýongom mannomaihât nanñan. Yâhâ loklipyenñe imbilipyenñe yengât nângâyîngimai yamâ yenñahât nanñanñimai yawu oap.

31 Den yan yuŋe emelâk Anitâŋe Mose den ekumu kulemguop ya miap. Den yamâ yuwu tap. “Lok âlâ me âlâŋe âwâŋe mâmâŋe pilâyelekmâ imbiŋahâlen torokatmu orowâk mandomawot yan hâkyetŋe konohâk otbuap.” Den yawu tap.

32 Otmu Moseŋe den kulemguop yaŋe topŋe âlâlâ miop. Yakât nâŋgâmune topŋe âlâ yuwu miap. Kiristoŋe ikŋe lohimbi nen orop biwinenŋaŋe kepeiakmâ konohâk otmu mansain ya.

33 Otmu âlâmâ yuwu miap. Loklipyenŋe yenahât nanŋaŋgimai yawuâk imbilipyenŋe yengât nâŋgâyinŋinimai. Otmu imbilipyenŋe loklipyenŋe ewe katyeknomai.

6

Nimnaomlipyenŋe yengât sâop.

1 Otmu nimnaomlipyenŋe yengât yuwu sâmune nâŋgâŋet. Yeŋe âwâ mâmâlipyenŋe yengât sâtyenŋan tem lâuyinŋim manŋetâ Anitâŋe yekmu ârândâŋ otbuap.

2 Yâhâ emelâk Anitâŋe girem den âlâ yuwu sâm Mose ekumu kulemguop.

“Yeŋe âwâ mâmâlipyenŋe yengât nâŋgâyinŋim denyenŋe lâum manŋet.” Yawu sâm ekuop.

Otmu girem den nombotŋe âlâlâ Mose ekumu kulemguop yamâ inâk sâop. Yâhâ topŋe katmâ girem den yan yu torokatmâ den âlâ yuwu sâm kalop.

3 “Denyenŋe lâum manŋetâ Anitâŋe nâŋgâyinŋimu yanâmâ sâp kâlewâk mannomai.” Yawu sâm ekuop.

Âwâ mâmâlipyeņe yeņgât sâop.

⁴ Yâhâ âwâ mâmâlipyeņe yeņgât yuwu sâmunne nâņgâņet. Nan baralipyenaye tepyeņe bâlemu kuk otmaiât ki mem gin gondondoņ katyeknomai. Yawu otmâ Kutdâhât den kâsikum yingim galemyongom heņgeņgunomai. Otmu mete pirik pirik otnomai yan lohotņan kuwikyeknomai.

Âi lok yeņgât sâop.

⁵ Yâhâ âi lok yeņgât yuwu sâmunne nâņgâņet. Kiristone yen orop manmu yâk hoņ bawanğimbâi yakât dopņeâk lok kunlipyeņe ewe katyekmâ tâņ tâņâk hoņ bayinginomai.

⁶ Yâhâ âi ya galemņaye yekmu ârândâņ olâkgâlâk nâņgâm hâkyenayak ki tuhunomai. Âi ya tuhunomai yanâmâ Anitâhât den ya tâņ tâņâk watmâ Kiristohât tem lâuwangim tiņâk tuhunomai.

⁷ Yawu otnomai yan lohâk hoņ bayingiaim sâm otnomai yamâ Kutdânenne hoņ bawanğinomai.

⁸ Yakât otmâ den yuwu sâmunne nâņgâm biwiyenjan katnomai. Lok âlâ me âlâņe lok kunlipyeņe yeņgât nep meyingimai me yeņe âi tuhuakmai yakât sâp patoen Kutdânenņaye âi memai ya ekmu ârândâņ otbuap otmuâmâ hâmeņe âlepņe yingimu menomai.

Lok kunņe papato yeņgât sâop.

⁹ Yâhâ lok kunņe papato yeņgât yuwu sâmunne nâņgâņet. Anitâ Kutdâyene himbimân tatmapņe lok âlâhât nâņgâmu yahatmu âlâhât nâņgâmu gemu yawu ki otmap. Sâp patoen yâkņe lok kerek nengât biwinnenne ekmâ âlâku ikņiâk ikņiâk dopnenņan matņe kâpekningiwuap. Yakât otmâ

hon bawalipyenaje kunlipyenje ewe katyekmâ lohotjan hon bayinjetâ benje kunlipyenaje gurâ topje âlâlâ ki mângâyeknomai.

¹⁰ Aiop, yene Kiristo orop biwiyenaje kepeiakmâ konohâk otmu yâkât wâtjan kinmâ kârihem mannomai.

¹¹⁻¹² Nenje Kiristohât den pat âlepje lohimbi ekyongomunje nângâmaihât lok bâlenaje mâtâp maŋuningim mansai. Otmu yâkje konok bia. Satangât hon bawalipje, weke bâlene, emet amboje, senduk banearâ, susun, âi weke, senje âlâlâ sâtje metje topje topje, ya kerekje mâtâp maŋuningine sâm otmai. Yakât otmâ Satanje biwiyenan kionmâ perâkje topje topje kâityongomagât Anitâje wât yingimu kârihem kinnomai.

¹³ Yuwu otmâ kârihem kinjetâ Satanje hon bawalipje orop mem ge katyekne sâm hâum pâpgum pilâyeknomai.

¹⁴ Nângân nângân bulâje âlâlâ biwiyenambâ tetemu den bulâje sâm lohimbi târârâhâk ekyongonomai. Yawu otmâ yâk orop biwiyenaje kepeiakmâ konohâk otmu tihit oranjim mannomai.

¹⁵ Otmu Kiristohât den pat âlepje lohimbi ekyongonjetâ nângânetâ biwiyene hurun sâekgât mâtâp teteyingiwuap yan hewewenâk ekyongonomai.

¹⁶ Otmu Satangât hon bawalipnaje yengât manmanyene mem bâleyingimaihât Anitâ yet Kiristo yetgâlen biwiyenaje tinâk kepeim mannomai.

¹⁷ Yawu manmâ Anitâje manman kârikjahât pat yakât bulâje yingimu mem Kiristo orop

heronje kakņan manbisâihât nâņgâm enġat yâhâp ki otnomai. Otmu Anitâhât den ya lohimbi kâsikum yinġinetâ nâņgânomai yan Wâtġât mâmâņahât Heakņe biwiyenje mem hewewenġ tuhuwuap. Yawu otyinġimu den ya nâņġâņetâ keterakyinġim henġenġuwuap.

18 Otmu Wâtġât mâmâņahât Heakņe mem hewewenġ tuhuyekmu yu yakât nâņġâm Anitâ ulitġunomai. Yawu otmâ biwi golâ manmâ Kiristohât lohimbi kerek yenġât nâņġâm haonmâ ârândânġ Anitâ ulitġum mannomai.

19 Otmu Wâtġât mâmâņahât Heakņe den âlâlâ biwinan katmâ mâmâņe otnihimu Kiristohât den pat âlepņe pahâk ekyongomune nâņġânomai. Otmu ekyongowom ya nâņġâņetâ keterakyinġiwuapġât yenje Anitâ ulitġunomai.

20 Otmu lohimbi kapi âlâen âlâen manmâ arai ya yenġâlen ari Kiristohât den pat âlepņe kâsikum yinġiwan. Kâsikum yinġimune lok nombotņane nâņġâņetâ gemu bet pilâm pâi emetņan mem katneġetâ manmâ gan. Yawu ġârâmâ nâņe den pat âlepņe lohimbi ekyongowomġât Kiristone menekmâ âi sâm nihiop. Yakât otmâ nâņe tem lâuwanġim den ya pahâk ekyongom ki lohotņe otbomġât Anitâ ulitġunomai.

Pauloņe den bâiņe sâm hâreop.

21-22 Aiop, bukunenņe âlâ, kutņe Tikiko, yâkņe Kutdâhâlen biwiņane tiņâk kepeim hoņ bawanġim mansap. Otmu nâņe bukulipne orop manman ġirawu mansain yakât yâk hânġângumune yenġâlen takawuap yan topņambâek ekyongomu nâņġâņetâ biwiyenġ huruņ sâwuap.

23-24 Otmu yeŋe Kutdânenŋe Yesu Kiristohâlen
biwiyenŋe tiŋâk kepeim tem lâuwaŋim mansai.
Yakât otmâ Anitâ yet Kiristone nâŋgâyiŋim
tihityeŋe otmutâ biwi nâŋgân nâŋgânyenŋe
kepeiakmâ konohâk otmâ huruŋ sâekgât
ulitguman. Bâiŋ.

Nâ bukuyeŋe,
Paulo

Yesuât Den Pat Âlepŋe
The New Testament in the Selepet Language of Papua
New Guinea
Nupela Testamen long tokples Selepet long Niugini

copyright © 1986 Wycliffe Bible Translators, Inc.

Language: Selepet

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 18 Mar 2025 from source files dated 31 Aug 2023

995083d2-705e-5a60-af47-1e36806ccbc